

4 kakitangan Rela buat tuntutan palsu didakwa

ALOR SETAR – Seorang penolong pegawai dan tiga anggota Jabatan Sukarelawan Malaysia (Rela) dihadapkan ke Mahkamah Sesyen di sini semalam atas tuduhan membuat tuntutan palsu elaun rondaan berjumlah RM59,520, dua tahun lalu.

Mereka ialah Sahrol Miza Samad, 44; Siti Munirah Abdul Rahim, 35; Mohd. Khairul Anuar Maliki, 32, dan Idrus Zakaria, 47.

Keempat-empat penjawat awam itu bagaimanapun mengaku tidak bersalah di hadapan Hakim Harmi Thamri Mohamad.

Mereka didakwa secara bersama-sama memperdayakan Rela Kedah dengan menggunakan dokumen tuntutan elaun membabitkan jumlah RM59,520 yang didakwa mengandungi butiran palsu.

Tuntutan elaun itu adalah berkaitan penugasan rondaan keselamatan sempena bulan kemerdekaan 2019 di Kulim sedangkan ia tidak dilaksanakan.

Kesalahan dilakukan di Pejabat Rela Kedah, Kompleks Kementerian Dalam Negeri, Pusat Pentadbiran Kerajaan Persekutuan di sini pada 10 September 2019.

Timbalan Pendakwa Raya Suruhanjaya Pencegahan Rasuah Malaysia (SPRM), Tan Sew Pin mengemukakan pendakwaan mengikut Seksyen 18 Akta 2009. Tertuduh diwakili peguam Burhanudeen Abdul Wahid.

Mahkamah menetapkan jaminan RM10,000 bagi setiap tertuduh dan mereka membayar jaminan yang dikenakan. Sebutan semula kes pada 27 Disember ini.



SAHROL MIZA (tengah) yang berdepan tuduhan membuat tuntutan palsu tiba di Mahkamah Sesyen Alor Setar semalam.